

conatus est, imaginem Dei in corpore sitam esse, abusus pro palliando errore, effato divino: Gen. I, 26. *Faciamus hominem in imagine nostra, secundum similitudinem nostram.* Quem autem, nisi planè ignarum, latet, rudes pariter Monachos Ægyptiacos, quibus Anthropomorphitarum nomen in peculium cessit, ad idem Geneseos dictum, tanquam primarium fundamentum, ac deamatum quasi palladium provocasse, id quod suis confirmant testimoniis *Basilii Hom. X. Hexaem, Socrates & Sozomenus ll. cc. vid. Gerhard. in Exeg. Loc. II. §. 116. p. 258. Petav. l. c. §. X. p. 88.* Jam, quæso, quodnam Audæum inter atque Anthropomorphitas intercedit differentiæ momentum? *Anthropomorphita* Deo corpus & membra corporea vindicare in deliciis habebant. Inficias id ire sustinebat Audæus, acriter tamen propugnabat, imaginem divinam in corpore humano consistere, illam cum Deo similitudinem in corpore conspicuam, ex pari cum Anthropomorphitis fonte, sc. Gen. I. 26, derivans. Ipse *Petavius l. c.* rem relinquit in suspenso, scribens: *Postremi commemorandi sunt Anthropomorphita, sive ab Audio, ut plerique putant, oriundi; sive ex ejus opinione stolidi errores ansam nacti, uti Deo humani corporis ac membrorum speciem attribuerent.* Nec est, quod ad comendandam Audæi causam, edisseras, ipsos nostrates Theologos ex imagine divina, corporis dotes, v. g. pulchritudinem, deducere, manifesto indicio, juxta illos imaginem Dei ex corporis elegantia elucere. Dignum enim est, quod audiatur, peregregium Academiae nostræ decus, *Magnif. D. D. Fechtius Noctium Christian Exerc. X. §. 49. p. 480: Constituerunt illi (Anthropomorphitæ) similitudinem inter Deum hominemque primum conditum in ipsa corporeorum membrorum ratione, ut qualia membra gereret in cælis Deus, talibus eundem referret in terris homo.* *Quæ crassa philosophan.*